

VENDIM
Nr. 175, datë 19.3.2026

**PËR PËRCAKTIMIN E KATEGORIZIMIT NË PAGË DHE SHPËRBLIMIT PËR
PUNËN NË BAZË TË CILËSISË E TË RËNDËSISË SË REZULTATEVE TË
KËRKIMIT SHKENCOR TË PERSONELIT TË INSTITUTEVE DHE TË NJËSIVE
TË VEÇANTA TË KËRKIMIT SHKENCOR PUBLIK**

Në mbështetje të nenit 100 të Kushtetutës dhe të pikës 4, të nenit 23, të ligjit nr. 109/2024, “Për shkencën dhe kërkimin shkencor në Republikën e Shqipërisë”, me propozimin e ministrit të Arsimit, Këshilli i Ministrave

VENDOSI:

1. Në fushën e veprimit të këtij vendimi përfshihen punonjësit kërkimorë-shkencorë dhe punonjësit ndihmësteknikë dhe administrativë të instituteve dhe të njësive të veçanta të kërkimit shkencor publik.

2. Elementet përbërëse të pagës bruto mujore të punonjësve kërkimorë-shkencorë janë, si më poshtë vijon:

a) Paga për pozicion/kategori, që përcaktohet në lidhjet nr. 1 dhe nr. 2, që i bashkëlidhen këtij vendimi dhe janë pjesë përbërëse të tij. Për pozicionet drejtues i institutit ose drejtues i njësisë së veçantë të kërkimit shkencor publik, paga është në përputhje me kategorinë, që zotëron punonjësi kërkimor-shkencor.

b) Shtesa për vjetërsi, në masën 1 (një) për qind, për çdo vit pune, por jo më shumë se për 25 (njëzet e pesë) vjet.

3. Klasat e pagave për punonjësit administrativë janë sipas lidhjes nr. 3, që i bashkëlidhet këtij vendimi dhe është pjesë përbërëse e tij. Elementet përbërëse të pagës bruto mujore të secilës klasë page (paga për pozicion, shtesa për vjetërsi në punë dhe shtesa e nivelit të kualifikimit) dhe vlerat e çdo elementi janë sipas përcaktimeve të vendimit përkatës të Këshillit të Ministrave për pagat e nëpunësve civilë të institucioneve të administratës shtetërore.

4. Klasat e pagave për punonjësit ndihmësteknikë janë sipas lidhjes nr. 4, që i bashkëlidhet këtij vendimi dhe është pjesë përbërëse e tij. Elementet përbërëse të pagës bruto mujore të secilës klasë page (paga për pozicion dhe shtesa për vjetërsi në punë) dhe vlerat e çdo elementi janë sipas përcaktimeve të vendimit përkatës të Këshillit të Ministrave për pagat e punonjësve mbështetës dhe punonjësve të tjerë të specialiteteve të ndryshme në disa institucione të administratës publike.

5. Shpërblimi për punën kërkimore-shkencore jepet nga të ardhurat e siguruara nga veprimtaria e institutit ose njësisë së veçantë të kërkimit shkencor publik, deri në kufirin 20 për qind të nivelit të pagës minimale, për kategoritë e personelit kërkimor-shkencor. Shpërblimi jepet me vendim të drejtuesit të institutit ose njësisë së veçantë të kërkimit shkencor publik, bazuar në pikëzimin për kriteret e vlerësimit të veprimtarisë kërkimore, të përcaktuara me udhëzim të ministrit përgjegjës për çështjet e shkencës dhe kërkimit shkencor, sipas nenit 29, të ligjit nr. 109/2024.

6. Efektet financiare, që rrjedhin nga zbatimi i këtij vendimi, përballohen nga fondet grant të miratuara në buxhetin e shtetit për institutet dhe njësitë e veçanta të kërkimit shkencor publik, fondet publike për kërkimin shkencor, si dhe nga të ardhurat e krijuara nga veprimtaria e tyre.

7. Ngarkohen ministria përgjegjëse për çështjet e shkencës dhe kërkimit shkencor, institutet dhe njësitë e veçanta të kërkimit shkencor publik për zbatimin e këtij vendimi.

Ky vendim hyn në fuqi pas botimit në Fletoren Zyrtare.

LIDHJA NR. 1
VLERA E PAGËS PËR POZICION/KATEGORI PËR PUNONJËSIT KËRKIMORË-
SHKENCORË

Pozicioni/kategoria	Vlera lekë/muaj
Drejtues kërkimor-shkencor	185 000
Kërkues shkencor i avancuar	170 000
Kërkues shkencor	137 000
Asistent kërkues-shkencor	105 000

LIDHJA NR. 2
VLERA E PAGËS PËR POZICION/KATEGORI PËR DREJTUESIT E INSTITUTIT DHE
DREJTUESIT E NJËSISË SË VEÇANTË TË KËRKIMIT SHKENCOR PUBLIK

Titullari sipas institucionit dhe kategorisë	Vlera lekë/muaj
Drejtuesi institutit i kategorisë “Drejtues kërkimor-shkencor”	220 000
Drejtuesi institutit i kategorisë “Kërkues shkencor i avancuar”	204 000
Drejtuesi njësisë së veçantë të kërkimit shkencor i kategorisë “Drejtues kërkimor-shkencor”	203 500
Drejtuesi njësisë së veçantë të kërkimit shkencor i kategorisë “Kërkues shkencor i avancuar”	187 000
Drejtuesi njësisë së veçantë të kërkimit shkencor i kategorisë i “Kërkues shkencor”	150 700

LIDHJA NR. 3
KLASAT E PAGAVE PËR PUNONJËSIT ADMINISTRATIVË

Pozicioni	Klasa e pagës
Drejtor drejtorie	II-2
Përgjegjës sektori	III-3
Specialist	IV-2

LIDHJA NR. 4
KLASAT E PAGAVE PËR PUNONJËSIT NDIHMËS TEKNIKË

Pozicioni	Klasa e pagës
Sekretar titullari	VII
Laborant	VI
Arkivist-protokollist	VI
Magaznier	V
Operator	IV
Shofer	III
Punëtor mirëmbajtjeje	III
Sanitar	I